

Morris Charts

U ovom broju, između ostalog, čitajte:

Line Chart

Area Chart

Bar Chart

Donut Chart

- **UPFBiH: Pravilnik o obaveznom označavanju (markiranju) tečnih naftnih goriva u BiH potrebno je doraditi**

Sparkline Charts

Line Chart

Bar Chart

Pie Chart

- **Predstavnici UPFBiH održali sastanak sa poslodavcima sa područja općina Gornji Vakuf/Uskoplje, Bugojno, Jablanica, Posušje i Mostar**

Easy Pie Charts

- **Ministar Delić i predstavnici UPFBiH: Zajednički koraci ka unapređenju zakonskih regulativa u oblasti rada i zapošljavanja**

- **Sastanak sa predstavnicima UNHCR i GIZ-a: Osigurati konkurentnost pri zapošljavanju tražitelja azila u FBiH**

- **Održan sastanak rukovodstva UPKS i predstavnika Vlade Kantona Sarajevo**

UPFBiH: Pravilnik o obaveznom označavanju (markiranju) tečnih naftnih goriva u BiH potrebno je doraditi



Udruženje poslodavaca u Federaciji Bosne i Hercegovine u načelu podržava donošenje Pravilnika o obaveznom označavanju (markiranju) tečnih naftnih goriva u BiH i uređenje ovih pitanja u skladu sa propisima iz oblasti vanjskotrgovinske politike Bosne i Hercegovine, koji se odnose na standardizaciju i kvalitet tečnih naftnih

goriva, ali insistira na njegovoj doradi i značajnijem uključivanju stručnjaka i zainteresirane javnosti u izradu konačnog teksta dokumenta.

UPFBiH naglašava da se radi o izuzetno važnom propisu te ga je stoga morala pratiti odgovarajuća, detaljna fiskalna procjena, posebno s aspekta ostvarivanja javnih prihoda i interesa države i ostvarenja prihoda budžeta po ovom osnovu.

„Smatramo da sistem donošenja Pravilnika nije bio dovoljno transparentan, nismo imali priliku učestvovati u njegovom kreiranju, dati svoje prijedloge i sugestije za njegovo poboljšanje. Ukoliko se Pravilnik usvoji u predloženom obliku bit će to još jedan dodatni parafiskalni namet na teret, ionako previše opterećenih, privrednih subjekata u FBiH“, ističu iz UPFBiH.

U UPFBiH smatraju predložena rješenja u smislu delegiranja nadležnosti za “usluge označavanja (markiranja)” pravnoj osobi ili konzorciju pravnih osoba nisu dobra, posebno to nije dobro regulirati podzakonskim aktom ili odlukama jednog ministarstva, jer se radi o izuzetno odgovornoj i finansijski zahtjevnoj aktivnosti te sugeriraju da se ova oblast uredi posebnim zakonom.

"Također smatramo da kaznene odredbe u predloženom Pravilniku nisu dobro riješene. Smatramo da ih treba dodatno urediti na način da se strožije kažnjavaju oni koji ne poštuju odredbe Pravilnika. Smatramo da bi to sigurno uticalo na odgovornije ponašanje subjekata uključenih u postupanja predviđena Pravilnikom", naglašavaju iz UPFBiH.

Prijedlog Pravilnika o obaveznom označavanju (markiranju) tečnih naftnih goriva u BiH pripremio je Ministarstvo vanjske trgovine i ekonomskih odnosa BiH, a u utorak bi se o navedenom pravilniku i njegovim odredbama trebala izjasniti i Vlada FBiH, zbog čega UPFBiH blagovremeno reagira i traži od Vlade FBiH da ove i druge primjedbe vezane za stupanje na snagu ovog Pravilnika analizira i uvrsti u mišljenje koje će dostaviti resornom ministarstvu u Vijeću ministara BiH.

Predstavnici UPFBiH održali sastanak sa poslodavcima sa područja općina/opština Gornji Vakuf/Uskoplje i Bugojno

Predstavnici Udruženja poslodavaca u Federaciji Bosne i Hercegovine (UPFBiH) održali su u Gornjem Vakufu/Uskoplju sastanak sa privrednicima sa područja ove i općine Bugojno. Tokom sastanka, kojemu je prisustvovao veliki broj poslodavaca iz ove dvije općine razgovarano je o aktivnostima koje poduzima UPFBiH u cilju smanjenja cijene rada i poboljšanja poslovnog ambijenta.



Poslodavci sa područja općina Gornji Vakuf/Uskoplje i Bugojno usaglasili su se da je neophodno pod hitno donijeti fiskalne zakone u cilju rasterećenja cijene rada, unaprijediti radno-pravno zakonodavstvo koje će liberalizirati tržište rada te insistirati na smanjenju, ali i ukidanju parafiskalnih nameta koji opterećuju poslovanje privrednih društava.

Sastanak je održan u okviru redovnih aktivnosti Udruženja poslodavaca u FBiH kako bi se razgovaralo o problemima i preprekama za kvalitetnije poslovanje u lokalnim zajednicama te o aktivnostima koje je potrebno poduzeti s ciljem poboljšanja poslovnog ambijenta.

Sastanak predstavnika UPFBiH sa poslodavcima u Jablanici i Posušju: Prioritetno smanjiti opterećenja na rad i liberalizirati tržište radne snage

Predstavnici Udruženja poslodavaca u Federaciji Bosne i Hercegovine razgovarali su sa poslodavcima iz Jablanice, Prozora/Rame, Posušja, Širokog Brijega i Gruda. Nakon što su poslodavcima predstavljene aktivnosti koje provodi Udruženje poslodavaca Federacije Bosne i Hercegovine, razgovarano je o problemima sa kojima se poslodavci iz ovih općina susreću u svome radu.

Poslodavci su istaknuli potrebu što hitnijeg donošenja novog zakona o doprinosima, porezu na dohodak, ali i nužnosti izmena zakona o porezu na dobit, zdravstvenom osiguranju, ali i Zakona o PDV-u i drugih propisa, čije bi donošenje



i primjena rasteretilo poslodavce od prevelikih poreznih i neporeznih davanja i stvorio povoljniji ambijent za poslovanje i investicije. Posebno je ukazano na problem nedostatka kvalificirane radne snage, kojeg dodatno komplicira neadekvatna zakonska procedura.

“Nažalost, procedure donošenja navedenih zakona predugo traju, a cijenu te sporosti plaćamo svi, kroz usporen razvoj i odlazak mladih i kvalificiranih kadrova iz BiH”, rečeno je na sastancima.

Predstavници UPFBiH sa poslodavcima sa područja Grada Mostara: Ubrzati liberalizaciju tržišta rada



Ključni problemi poslodavaca u Federaciji Bosne i Hercegovine vezani su za fiskalne i parafiskalne namete, brojna opterećenja privrede i nedostatak kvalificirane radne snage, zbog čega poslodavci insistiraju na hitnom donošenju zakona koji će rasteretiti cijenu rada, liberalizirati tržište radne snage te propisa kojima će se smanjiti ili

ukinuti parafiskalni nameti, zaključeno je na sastanku predstavnika Udruženja poslodavaca u Federaciji BiH sa poslodavcima sa područja Grada Mostara.

Na sastanku je istaknuto da je neophodno što prije donijeti set fiskalnih zakona kojima će se smanjiti porezi i doprinosi na plaće koji su u ovome trenutku među najvećima u Evropi. Osim toga, poslodavci su ponovo ukazali na trend odlaska kvalificirane radne snage iz BiH pri čemu nadležne državne institucije ne poduzimaju adekvatne mjere kako bi se smanjio odlazak i liberaliziralo tržište radne snage.

Poslodavci su, također, ukazali na previše parafiskalnih nameta kojima je opterećena privreda, a malo se ili nimalo radi na smanjenju cijene ili ukidanju parafiskalnih nameta koje poslodavci plaćaju lokalnim zajednicama, kantonima, entitetima i državi.

Predstavници UPFBiH upoznali su poslodavce sa područja Grada Mostara sa aktivnostima koje se poduzimaju kako bi se donošenjem nove ili izmjenom postojeće zakonske regulative smanjilo opterećenje cijene rada, poboljšao poslovni ambijent te liberaliziralo tržište radne snage. Prvi korak u tom pravcu je usvajanje dopuna Zakona o radu FBiH koje omogućavaju zapošljavanje studenata.

Ministar Delić i predstavnici UPFBiH: Zajednički koraci ka unapređenju zakonskih regulativa u oblasti rada i zapošljavanja

Federalni ministar rada i socijalne politike Adnan Delić održao je sastanak s predstavnicima Udruženja poslodavaca u Federaciji BiH na kojem su razmatrani aktuelni izazovi i aktivnosti u oblasti rada, zapošljavanja i zaštite na radu.




Na sastanku je napravljen presjek dosad pokrenutih zajedničkih aktivnosti Ministarstva i Udruženja poslodavaca. Diskutirano je o potrebnim izmjenama zakonskih regulativa koje se odnose na rad, zapošljavanje i zaštitu na radu, uključujući zakone o radu, zaštiti na radu, posredovanju u zapošljavanju i socijalnoj sigurnosti nezaposlenih, te profesionalnoj rehabilitaciji i zapošljavanju osoba sa invaliditetom, kao i Zakon o vijeću zaposlenika.

Udruženje poslodavaca pohvalilo je donošenje dopune Zakona o radu koja se odnosi na privremene i povremene poslove, omogućujući tako studentima legalno zaposlenje. Istaknuto je da je ovo značajan korak naprijed u regulaciji tržišta rada, jer omogućava regularno zapošljavanje studenata koji su do sada bili dijelom sivog i crnog tržišta rada usljed neusklađenosti zakonskih propisa s promjenama na tržištu rada. Također, dogovorena je zajednička organizacija radionice za poslodavce s ciljem upoznavanja sa izmjenama koje trebaju biti implementirane u interne akte kako bi se uskladili s dopunom Zakona o radu i omogućili angažiranje studenata na privremenim i povremenim poslovima - navodi se u saopćenju Ministarstva. Ova inicijativa naglašava zajednički cilj Ministarstva i Udruženja poslodavaca da se stvore povoljniji uslovi za rad i zapošljavanje, te unaprijedi zaštita prava radnika u FBiH.

Saradnja na pripremi Programa mjera zapošljavanja u Kantonu Sarajevo

Na inicijativu Službe za zapošljavanje Kantona Sarajevo, 24. maja 2024. godine je u prostorijama Službe održan sastanak sa ciljem predavljanja prijedloga programa o izmjenama i dopunama Programa mjera za podsticaj zapošljavanja i održavanja više stope zaposlenosti i poboljšanje strukture zaposlenih u Kantonu Sarajevo u 2024. godini.



Pored direktorice Službe za zapošljavanje Kantona Sarajevo, Amine Džonlagić i predstavnika Službe za zapošljavanje Kantona Sarajevo, sastanku su prisustvovali i ministar za boračka pitanja Omer Osmanović, a u ime poslodavaca Suhad Ećo, predsjednik Upravnog odbora Udruženja poslodavaca Kantona Sarajevo i Mario Nenadić, direktor Udruženja poslodavaca u FBiH te Marijana Šećibović, v.d. direktorice Poslovno-obrazovnog centra UPFBiH. Sastanku je prisustvovao i predstavnik sindikata, Samir Kurtović.

Direktorica Službe za zapošljavanje Kantona Sarajevo predstavila je prijedlog Programa i ukazala na neophodne promjene i Vladine mjere za poticaj zapošljavanja i unapređenja stope zaposlenosti u Kantonu Sarajevo. Učesnici sastanka upoznati su o planiranoj dinamici pripreme Programa, dostavljanja iste Vladi Kantona Sarajevo i konačnoj objavi i implementaciji programa u 2024. godini. Pored 13 miliona već implementiranih sredstava za ove namjene, na programe koji su u proceduri planira se utrošiti ukupno oko 54 miliona KM. Predstavnici poslodavaca ukazali su na važnost ovih programa u Kantonu Sarajevo, posebno uvažavajući činjenicu da još uvijek nije došlo do smanjenja opterećenja cijene rada i drugih poticajnih uvjeta za zapošljavanje u realnom sektoru u Kantonu Sarajevo i čitavoj FBiH na čemu intenzivno sarađuju sa predstavnicima vlasti.

Posebno je naglašena važnost početka implementacije ovih projekata u što skorijem periodu, a posebno u toku turističke, građevinske, poljoprivredne sezone, tokom koje je pojačan interes za zapošljavanje u Kantonu Sarajevo. Poslodavci su naglasili važnost dijaloga i razumijevanja ekonomsko-socijalnih partnera o ovim pitanjima i zahvalili direktorici na organizaciji sastanka i prilici da reagiraju, odnosno, nakon konsultacija sa članstvom dostave

komentare i prijedloge za izmjenu predloženog Programa mjera, što će naravno iskoristiti i dostaviti blagovremeno. Svoj stav o programima i izraze podrške i unapređenja programa predstavili su i ministar Osmanković i predstavnik sindikata.

Predstavnici poslodavaca su zbog važnosti predmetne problematike predložili i organizaciju tematskih sjednica Vlade i Skupštine Kantona Sarajevo, što je veoma pozitivno prihvaćeno od strane sudionika sastanka. Svi učesnici su zahvalili novoj direktorici na njenim aktivnostima i očekuju intenzivnu saradnju u narednom periodu.

Postignuti rezultati opravdali projekat Zaključavamo cijene



Projekat Federalnog ministarstva trgovine "Zaključavamo cijene", u kojem je učestvovalo više od 30 trgovinskih subjekata, a snižena cijena za više od 60 proizvoda, nakon pet mjeseci primjene postigao je značajne rezultate.

Kupci su na korpi označenih prehrambenih i higijenskih proizvoda mogli uštedjeti prosječno 17,5 posto što je oko 50 KM, prodavci su zabilježili povećan promet tih proizvoda za oko 45 posto, a udio domaćih proizvoda za koje je porasla potražnja je veći od 70 posto.

Projekat koji je Ministarstvo kreiralo sa Udruženjem poslodavaca, potrošačima i Sindikatom trgovačkih radnika na dogovornoj i društveno odgovornoj bazi, dio je mjera Vlade FBiH kojima nastoji suzbiti inflaciju i pomoći građanima da prevaziđu turbulencije na tržištu. Ovaj model ocijenjen je kao dobar način da se na partnerskoj osnovi kreiraju funkcionalna rješenja.

Međunarodna organizacija rada (ILO) najavljuje podršku u jačanju kapaciteta UPFBiH



Na inicijativu UPFBiH pokrenut je projekat prema Međunarodnoj organizaciji rada (ILO) koji za cilj ima jačanje kapaciteta UPFBiH. Međunarodna organizacija rada uputila je u misiju delegaciju koja ima za cilj provesti projekat sa ciljem pregleda kapaciteta UPFBiH i pružanja podrške u razvijanju istih.

Tokom cjelosedmičnih aktivnosti projektni tim imao je priliku napraviti detaljan pregled kapaciteta, uvida u ljudske potencijale, članstvo, način rada i poslovanja UPFBiH, odnose sa vlastima, nevladinim organizacijama, sindikatima, medijima i dr. Tokom posjete obavili su razgovore sa predstavnicima upravljačkih struktura UPFBiH, stručnom službom te predstavnicima spomenutih i zainteresiranih grupa na bazi čega će biti sastavljen inicijalni izvještaj i kreirani određeni projekti podrške.

Sastavljeni inicijalni izvještaj bit će predstavljen Upravnom odboru UPFBiH, sa ciljem pripreme odgovarajućih programa podrške i ad hoc mjera za jačanje kapaciteta UPFBiH.

Direktor UPFBiH se zahvalio ILO-u na podršci, ali i svim učesnicima koji su sudjelovali na sastancima i ciljanim intervjuima sa ILO konsultantima tokom obavljene misije.

Sastanak sa predstavnicima UNHCR: Osigurati konkurentnost pri zapošljavanju tražitelja azila u FBiH



Na inicijativu UPFBiH organiziran je sastanak u UNHCR-u o temi prava rada i olakšanog zapošljavanja osoba tražitelja azila u FBiH. Sastanku su prisustvovali Jug Bissot, viši oficir za međunarodnu zaštitu UNHCR sa saradnicama

Brankom Tomić, Majom Hajdar i Indrom Dedić te Mario Nenadić, direktor UPFBiH, Jasmina Muratović, pravnica i Kanita Smailbegović, članica UPFBiH.

Direktor UPFBiH obavijestio je predstavnike UNHCR-a o prilikama i položaju tražitelja azila pri zapošljavanju u realnom sektoru u FBiH. Tom prilikom naglašeno je da su tražitelji azila za sada na neadekvatan način involvirani u sistem zapošljavanja, a posebno u sistem podrške nadležnih službi za njihovo eventualno zapošljavanje u radne procese u kompanijama u FBiH. Sa te strane UPFBiH je predložilo određene inicijative i pilot projekte kojima bi se omogućilo konkurentno i održivo zapošljavanje ove kategorije stranaca u FBiH.

Prvi koraci bili bi pilot projekti u skladu sa zakonom i dorada propisa kojima se uređuje pravo rada i zapošljavanja ovih osoba u BiH, obzirom da se radi o propisima na nivou BiH. Predstavnici UNHCR-a naglasili su važnost ovih pitanja i predstavili aktivnosti koje rade sa nadležnim vlastima. Inicijativu UPFBiH ocijenili su veoma korisnom i najavili nastavak razgovora i aktivnosti na unapređenju ovih pitanja.

Sa predstavnicima GIZ-a o projektu unapređenja rada i zapošljavanja tražitelja azila u BiH



U prostorijama Udruženja poslodavaca u FBiH održan je sastanak sa predstavnicima organizacije GIZ, projekt menadžericom Sophie Meinke i Edinom Šabić o temi razvoja projekta koji će unaprijediti rad i zapošljavanje tražitelja azila u BiH.

Meinke je obavijestila predstavnike UPFBiH o

namjeri pokretanja jednog projekta o ovoj temi i zatražila od UPFBiH konsultacije.

Predstavnici UPFBiH, Mario Nenadić i Jasmina Muratović informirali su predstavnike GIZ-a o ključnim prioritetima u radu UPFBiH, u skladu sa odlukama Upravnog odbora UPFBiH, a to su fiskalna i parafiskalna rasterećenja cijene rada i liberalizacija tržišta rada. Po pitanju liberalizacije tržišta rada ključni su izazovi unaprijediti propise za zapošljavanje domaće radne snage, ali i za olakšano zapošljavanje stranaca u situacijama kada nije moguće osigurati domaću radnu snagu.

Predstavnici UPFBiH ukazali su na potrebu da se omogući rad svih isključenih i marginaliziranih grupa, kao što su osobe sa invaliditetom, stranci pod međunarodnom zaštitom i legalni migranti, studenti, penzioneri, i dr. Utoliko je interes poslodavaca da i tražitelji azila u BiH pod zakonom propisanim uslovima i stimulativnim programima zapošljavanja budu uključeni u radne procese u FBiH.

Predstavnici GIZ-a i UPFBiH razmijenili su neophodne informacije. Predstavnici UPFBiH dali su prijedloge i inicijative konkretnih projektnih aktivnosti te je dogovoren nastavak saradnje o ovim pitanjima.

Održan sastanak predstavnika UPFBiH i GS1 Bosne i Hercegovine



Predstavnici Udruženja poslodavaca u FBiH, direktor Mario Nenadić i pravica Jasmina Muratović, na poziv predstavnika GS1 Bosne i Hercegovine posjetili su 08.05.2024. godine kompaniju i razgovarali o važnim zajedničkim pitanjima.

Ispred GS1 Bosne i Hercegovine sastanku su prisustvovali direktor Adi Turković i rukovodilac finansija i marketinga Nevena Kravec-Stevanović. Sastanku je prisustvovao i direktor Penny plus d.o.o. Sarajevo Almedin Kadrić.

Tokom sastanka razgovaralo se o ključnim pitanjima unapređenja privrednih aktivnosti i posebno zakonske regulative na polju digitalizacije. Posebno se razgovaralo o aktuelnim temama e-fiskalizacije, elektronske razmjene podataka i Digitalnih pasoša proizvoda. Učesnici su se usaglasili da su spomenute teme od izuzetne važnosti za privredne aktivnosti u svim oblastima, posebno u trgovini, a posebno u kontekstu usklađenosti sa Evropskim direktivama, smanjenju emisije CO2 i putu ka Zelenoj Evropi.

Naglašena je važnost Digitalnih pasoša proizvoda i identifikacije proizvoda u osiguravanju transparentnosti poslovanja i vidljivosti lanca snabdijevanja i Zakona o unutrašnjoj trgovini koji je u parlamentarnoj proceduri i koji već sada radi unapređenja uvoza i izvoza roba i usluga u FBiH treba biti usklađen sa nadolazećim evropskim propisima i regulativom. Ove inicijative predstavljaju ključne korake ka stvaranju pametnijeg, održivijeg i efikasnijeg poslovanja koje će podržati zelenu tranziciju Europe. U kontekstu navedenog, GS1 Bosne i Hercegovine i Udruženje poslodavaca u FBiH suorganizuju 8. GS1 Konferenciju "Digitalna ekspanzija: Put BiH u bespapirno poslovanje" od koje se očekuje da bude dobar osnov i ključna platforma za dalje napredovanje BiH u digitalizaciji. Očekuje se da će Konferencija najavljena za 30. maj 2024. godine biti izuzetno korisna za sve učesnike i doprinijeti razvoju poslovanja u Bosni i Hercegovini.

Održan sastanak rukovodstva UPKS i predstavnika Vlade Kantona Sarajevo

Rukovodstvo Udruženja poslodavaca Kantona Sarajevo predvođeno predsjednikom Suadom Ećom održalo je sastanak sa delegacijom Vlade KS koju je predvodio premijer Nihad Uk.

U konstruktivnoj atmosferi razgovarano je o realizaciji projekata koje provodi Kanton Sarajevo, kao i ranijih zaključaka oko ukidanja fiskalnih i parafiskalnih nameta, reforme tržišta rada i pitanja zapošljavanja, zakona o dualnom obrazovanju, zakona o ekonomsko-socijalnom vijeću za područje KS, izgradnja proizvodno poslovne infrastrukture te prijedlozima projekata koje je iniciralo UPKS.



Brojni propisi su na čekanju već dugi niz godina, a to se odnosi na propise iz oblasti privrede, parafiskalnih nameta, školstva, ekonomsko socijalnog dijaloga, socijalne zaštite, zapošljavanja, komunalne privrede i dr. Poslodavci su istaknuli da se mladima mora poslati ohrabrujuća poruka s obzirom da snosimo odgovornost za njihovu budućnost i ostanak u BiH.

“Mišljenja smo da zajedničkim djelovanjem u vrlo kratkom roku možemo to promjeniti i takve poruke smo uputili premijeru i ministrima. Stava smo da Sarajevo može i treba biti model za razvoj privrede i u drugim dijelovima FBiH, jer ima dobre razvojne i budžetske kapacitete”, ističu poslodavci.

Poslodavci su se zahvalili premijeru Uku i ministrima, rukovodiocima institucija na uspostavljenoj saradnji, ali su istaknuli da ima prostora za proširenje i unapređenje te saradnje te se nadaju da bi ovaj sastanak mogao i trebao biti ozbiljna prekretnica i da se u narednom periodu mogu očekivati bolji uslovi za poslovanje privrednih subjekata i obrtnika, a samim time i bolje rezultati poslovanja.

Premijer Uk zahvalio se na saradnji poslodavcima iz realnog sektora u Kantonu Sarajevo uz najavu da će pregledati i tražiti rješenja za unapređenje trenutnog stanja u poslovnom okruženju.

Direktor UPFBiH Mario Nenadić prisustvovao Skupštini Asocijacije poduzetnika Hercegovine



Direktor Udruženja poslodavaca u FBiH Mario Nenadić prisustvovao je redovnoj Izvještajnoj skupštini Asocijacije poduzetnika Hercegovine, održanoj 28. maja 2024. godine u Tehnološkom parku Intera.

Na Skupštini su članovi Asocijacije mogli čuti detaljniji pregled najvažnijih aktivnosti APH između dvije skupštine te je istaknuo da je APH u 2023. i dosadašnjem toku 2024. godine svoje aktivnosti usmjerila na nekoliko najvažnijih tema kao što su izmjene fiskalnih i drugih reformskih zakona, posebno Zakona o doprinosima, Zakona o porezu na dohodak u FBiH i Zakona o PDV-u.

Asocijacija je na lokalnom nivou neumorno ukazivala na potrebu promjene komunalnih propisa i odluka iz nadležnosti Gradskog vijeća Mostara, s naglaskom na velike korisnike, odnosno poslovne subjekte, potom na problematiku koju su izazvali radovi u obnovi saobraćajne infrastrukture, posebno prometnica koje su značajne za poslovne subjekte, na potrebu trajnog rješavanja sjevernog i južnog ulaza u grad, kao i svih drugih infrastrukturnih objekata važnih za bolje poslovno okruženje.

Skupština Asocijacije je usvojila izvještaj o radu, finansijski izvještaj kao i Strateški plan rada za naredno razdoblje. APH želi u budućnosti postati ekonomsko-socijalni partner na području HNK kroz aktivnosti koje su planirane u usvojenom strateškom planu rada kao što su promocija privatnog poduzetništva, stvaranje pozitivne poslovne i društvene klime.

Prezentiran program poticaja maloj privredi Ministarstva privrede KS za 2024. godinu

Predsjednik Udruženja poslodavaca Kantona Sarajevo, Suhad Ećo i direktor Udruženja poslodavaca u FBiH, Mario Nenadić prisustvovali su Prezentaciji programa poticaja maloj privredi Ministarstva privrede Kantona Sarajevo. Ispred Kantona Sarajevo Prezentaciji su prisustvovali premijer Kantona Sarajevo Nihad Uk, ministri u Vladi Zlatko Mijatović, Naida Hota-Muminović, Omer Osmanović, Admir Katica, predsjedavajući Skupštine KS Elvedin Okerić, dogradonačelnik Grada Sarajeva Samir Avdić, kao i brojni privrednici, obrtnici i potencijalni aplikanti programa.

Za provođenje mjera razvoja male privrede u Budžetu Kantona Sarajevo planirano je 8,5 miliona KM.

"Poticaji u sektoru male privrede podržavaju raznolikost i inkluzivnost. Mali poduzetnici su temelj naših lokalnih zajednica i zapošljavaju ljude iz različitih socio-ekonomskih i kulturnih pozadina. Kroz ove poticaje, nastojimo svim malim i srednjim preduzećima osigurati jednaku priliku za uspjeh. Razvoj privrede jeste naš cilj, ali to ne možemo bez pojedinaca. Vi ste nosioci razvoja, vrijednost koju ne možemo zamijeniti i budućnost na čijoj strani želimo biti. Želimo da cijeli proces implementacije programa bude transparentan, da svako u Kantonu Sarajevo zna kada Ministarstvo privrede raspisuje javne pozive i da svaka marka od 8,5 miliona koliko je predviđeno za ovu namjenu završi u pravim rukama. Pozivam vas da budete hrabri, poduzetni da aplicirate na javne pozive koje objavljujemo", istaknuo je ministar Mijatović.

Novi programi ove godine su: "Poticaj direktnih stranih ulaganja - Podrška za osnivanje pravnog lica čiji je osnivač strani ulagač", "Finansijski poticaj sa inkubacijom za novoosnovane poslovne subjekte", te "Poticaj za ulaganja novoosnovanih poslovnih subjekata registrovanih u 2023. i 2024. godini".

Predstavnici Udruženja poslodavaca, uz obavijest o najavljenom programu obavještavaju članice da iskoriste ove mjere Vlade Kantona Sarajevo i Ministarstva privrede Kantona Sarajevo i s tim u vezi upućujemo na kalendar objave javnih poziva, te na web stranicu poticajimpks.ba koja će biti aktivna od dana objavljivanja javnih poziva, a putem koje se mogu dobiti sve informacije u vezi sa ovim programima.

Sekretarka UPFBiH učestvovala na seminaru Tripartite Exchange Seminar



U periodu od 28.05. – 31.05.2024.godine sekretarka UPFBiH Mersiha Jusić učestvovala je na seminaru „Tripartite Exchange Seminar” koji je organizovao Eurofound, Cedefop i EEA. Tripartitni seminar razmjene (TES) je imao za cilj da se identifikuje način na koji se zelena, Pravedna tranzicija rješava kroz socijalni dijalog u europskim zemljama. TES je održan u Europskom ekonomskom i socijalnom odboru (EESC).

Učesnicima je dobrodošlicu poželio predsjednik EGSO-a Oliver Röpke ističući da se seminar održava sa ciljem poboljšanja kapaciteta socijalnih partnera i vlada za učešće u socijalnog dijaloga u Pravednoj tranziciji.

Na navedenom seminaru sudjelovalo je 40 nominiranih učesnika iz organizacija socijalnih partnera u državama članicama EU-a i zemljama zapadnog Balkana, koji su predstavljali sindikate, organizacije poslodavaca (i mala i srednja poduzeća) i vlade, koji su zajednički istraživali i učili svoj put naprijed o tome kako socijalni dijalog može pomoći Pravednoj tranziciji.

Fokus Tripartitnog seminara razmjene 2024. je identificiranje načina na koji se zelena Pravedna tranzicija rješava kroz socijalni dijalog u europskim zemljama.

Prvog dana učesnici su upoznali jedni druge i različite izazove Zelene pravedne tranzicije u svojim zemljama i različite perspektive kroz metode sudjelovanja, što je kulminiralo planom izazova i ideja za prijedloge politika za Zelenu pravednu tranziciju.



Drugog dana učesnici su se dodatno angažirali primjenom razmjena i učenja na svjetskom nivou. Trećeg dana fokus je bio na prelasku na akcije: učesnici su razvili četiri konkretna prijedloga o tome što mogu konkretno učiniti u praksi i obavezali se da će zajedno nastaviti svoj rad u grupama za vježbanje tijekom sljedećih nekoliko mjeseci, kako bi pripremili i pokazali različitosti u praksi.

U decembru će se učesnici ponovno okupiti online kako bi podijelili iskustva i napredak u praksi.

Socijalni dijalog u praksi, koristeći socijalno učenje i sistemski pristup, potreban je za postizanja zelene i pravedne tranzicije.

**Sekretarka UPFBiH Mersiha Jusić učestvovala
na Konferencije civilnog društva Zapadnog
Balkana na visokoj razini „Nastavak uspješne
priče o proširenju EU – Donošenje koristi
Zapadnom Balkanu prije pristupanja“**

Socijalnim partnerima se mora pružiti podrška u aktivnom uključivanju u razvoj, provedbu, praćenje i evaluaciju planova reformi jedan je od zaključaka Konferencije civilnog društva Zapadnog Balkana na visokoj razini „Nastavak uspješne priče o proširenju EU – Donošenje koristi zapadnom Balkanu prije pristupanja“ koja je održana u Ljubljani 24.maja 2024. godine.

Ispred Udruženja poslodavaca u FBiH, a na poziv Evropskog ekonomskog i socijalnog savjeta (EESC) i njegovog Odbora za praćenje Zapadnog Balkana, na Konferenciji civilnog društva Zapadnog Balkana na visokom učestvovala je sekretarka UPFBiH, Mersiha Jusić. Pomenutom događaju prisustvovali su članovi EESC, predstavnici socijalnih partnera, predstavnici organiziranog civilnog društva iz zemalja Zapadnog Balkana te članovi organiziranog civilnog društva i dužnosnici iz Slovenije.

Konferenciju su otvorili predsjednik EESC-a Oliver Ropke, potpredsjednica Vlade i ministarka vanjskih i evropskih poslova Slovenije Tanja Fajon, generalna sekretarka Savjeta za regionalnu saradnju (RCC) Majlinda Bregu, kao i evropski komesar za susjedstvo i proširenje Oliver Varhelji koji je učesnicima skupa poslao video poruku.



Na otvaranju Konferencije učesnici su se osvrnuli na trenutnu geopolitičku situaciju, dešavanja u pristupnim pregovorima Zapadnog Balkana, problematiku u oblasti vladavine prava, osnovnih prava i pomirenja, kao i uloge organizacija civilnog društva na putu Zapadnog Balkana ka Evropskoj uniji. Učesnici na Konferenciji su izrazili žaljenje što su socijalni partneri do sada bili samo obaviješteni o razvoju programa reformi na zapadnom Balkanu, ali nisu bili uključeni u njega i zaključili su da programi reformi i naknadni obvezujući sporazumi moraju sadržavati sažetak relevantnih mehanizama za uključivanje socijalnih partnera i civilnog društva. Pomenutom Konferencijom obilježeno je 20 godina najvećeg proširenja EU do sada i 20 godina od ulaska Slovenije u Uniju.

Događaj je pružio priliku učesnicima da razmijene mišljenja o potrebnim reformama na Zapadnom Balkanu i u EU kako bi se politika proširenja održala kao jedna od najvažnijih priča o uspjehu EU. Bila je to prilika da se razgovara o aktualnoj situaciji civilnog društva u regiji i potrebi njegove bolje uključenosti u pristupni proces. Učesnici su usvojili zaključke upućene nacionalnim tijelima i evropskim institucijama.

Nove članice UPFBiH - Eurosaj i Arni Soft d.o.o.

Eurosaj je posvećen pružanju izvrsnih rješenja za zaštitu metala od korozije, oksidacije i drugih štetnih utjecaja.

Eurosaj se ističe i po svom stalnom fokusiranju na istraživanje i razvoj novih proizvoda. Tim stručnjaka neprestano radi na inovacijama, edukuje se na polju novih tehnologija koje omogućavaju još bolju zaštitu metala i postizanje izvanrednih rezultata.

Više o kompaniji pročitajte [OVDJE](#).

Kompaniju Arni Soft d.o.o. čini stručan tim stručnjaka koji su svoje profesionalno iskustvo stekli radeći na najsofisticiranijim projektima razvoja softvera. Uspjeli su razviti velike poslovne projekte, kako lokalno tako i na daljinu. Svojim klijentima isporučuju vrhunska rješenja frontendom i backendom, prateći životni ciklus projekta od njegovog početka do puštanja u proizvodnju.

Više o kompaniji pročitajte [OVDJE](#).



UDRUŽENJE POSLODAVACA

UDRUŽENJE POSLODAVACA FBiH
MARŠALA TITA 6, 71 000 SARAJEVO

TEL: 00 387 33 552 460

FAX: 00 387 33 552 461

MAIL: info@upfbih.ba

WEB: www.upfbih.ba